



HERØY KOMMUNE  
Postboks 274  
6099 FOSNAVÅG

Saksbehandlar, innvalstelefon  
Thomas Aurdal, 71 25 84 67

## Vedtak om endring av løyve - tiltak i sjø - Herøy 38/301 - Paradisbukta - Eggesbønes - utfylling

Statsforvaltaren i Møre og Romsdal syner til søknad innsend 08.05.2026 om endring av løyve nr. 2025.0712.T (datert 11.09.2025) til utfylling i sjø ved Eggesbønes, gnr. 38 bnr. 301, i Herøy kommune.

### Bakgrunn

Herøy kommune fekk 11.09.2025 etter søknad løyve etter forurensningsloven til utfylling i sjø ved Paradisbukta ved Eggesbønes. Løyvet omfatta utfylling med 300 000 m<sup>3</sup> massar over eit areal på 50 000 m<sup>2</sup>, 65 000 m<sup>2</sup> inkludert fyllingsfot. Det var planlagd å nytte massar frå Kystverket sitt prosjekt i farleia til utfyllinga. Planlagd oppstart var sumaren/hausten 2026, med ferdigstilling i 2027.

Kommunen sende 08.05.2026 inn søknad om endring av løyvet. Det var utført geoteknisk prosjektering av Multiconsult, som synte at det var eit behov for fortanning i mindre område for å sikre fyllinga stabilitet. Dette skulle utførast ved sprenging (pigging var vurdert å vere for krevjande tidsmessig, økonomisk og teknisk). Det opplysast å vere viktig å kunne utføre dette om sumaren slik at området kan forberedast før Kystverket sitt prosjekt startast opp. Vedlagt søknaden var ein rapport utarbeidd av Multiconsult (dokumentkode 10270976-01-TVF-RAP-002\_rev.03, datert 30.04.2026) med vurderingar knytt til partikkelspreiing, undervassstøy, toleransegrenser (fisk) og avbøtande tiltak.

Mowi sitt akvakulturanlegg 30597 Eggesbønes ligg i nærleiken til tiltaksområdet. Kommunen opplyser at den har hatt dialog med Mowi, og at dei er samde om at sprenginga skal planleggast i fellesskap, slik at den i størst mogleg grad kan utførast når det ikkje er fisk i ventemerdane.

### Høyring av endringssøknad

Den opphavlege søknaden var på høyring i juli-august 2025 med kunngjering i lokalavis og på Statsforvaltaren i Møre og Romsdal si nettside, og kopi av søknaden vart send relevante høyringspartar med oppmoding om uttale. Berre Fiskeridirektoratet sende inn uttale.



Herøy kommune opplyser i endringssøknaden at dei har vore i samtale med Mowi, som driv akvakulturanlegg nær tiltaksområdet. Dei skriv: *Vi har dialog med Mowi, og vi er samde om at vi i fellesskap skal planlegge sprengninga sånn at dette i størst mogleg grad skal skje når det ikkje er fisk i ventemerdane deira, noko som krev god dialog og samhandling.*

Dette er i tråd med vilkår 2.7 i opphavleg løyve, som inneheld fylgjande setning: *«Utfyllingstiltak skal koordinerast med aktivitetane på MOWI sitt anlegg 30597 Eggesbønes for å unngå negativ påverknad på fisk i anlegget.»*

På bakgrunn av dette vurderer vi at relevante tilhøve vart tilstrekkeleg belyst under høyringa av den opphavlege søknaden og at verksemda i nærleiken som kan verte påverka av tiltaka er tilstrekkeleg inkludert i dialogen om tiltaka. Vi ser det difor ikkje som naudsynt å gjennomføre høyring av endringssøknaden, jf. forvaltningsloven § 16 tredje ledd bokstav c.

Mowi ASA og Fiskeridirektoratet er sett på kopi i vårt nye vedtak.

### **Statsforvaltarens vurderingar**

Statsforvaltaren i Møre og Romsdal forstår behovet for sprenging i tiltaksområdet for å oppnå tilstrekkeleg stabilitet til utfyllinga. Vi vurderer at å utvide dei planlagde aktivitetane med naudsynt sprenging ikkje vil påverke vesentleg i forhold til dei vurderingane etter naturmangfaldlova og vassforskrifta vi gjorde i det opphavlege vedtaket.

Då sprenging i sjø gjev vesentleg undersjøisk støy og trykkpåverknad, er det viktig at dette ikkje utførast i gyte- og oppveksttida til torsken. Det er allereie eit vilkår i opphavleg løyve som seier at utfylling ikkje skal skje i denne perioden. Vilkåret vert utvida slik at heller ikkje sprenging skal gjerast då. Perioden er frå før sett til 1. februar til 31. mai. I endringssøknaden er det oppgitt at sprenging skal utførast om sumaren, så her vil det ikkje vere konflikt.

Fisk i anlegget til MOWI ved Eggesbønes vil vere sårbar for forstyrringane som fylgjer med sprenging. Multiconsults rapport vedlagt endringssøknaden har fleire anbefalingar om korleis dette skal handsamast, og kommunen opplyser i søknaden at dei har dialog med verksemda. I endra løyve er det sett nokre nye vilkår, i stor grad basert på anbefalingane frå konsulenten, som skal sikre omsynet til fisken i anlegget.

### **Konklusjon - vedtak**

Statsforvaltaren i Møre og Romsdal vurderer at miljølempa ved tiltaka skildra i endringssøknaden er akseptabel sett i forhold til samfunnsnytta ved tiltaket, og at løyvet kan endrast slik det er søkt om på bakgrunn av fastsette, oppdaterte vilkår.

### **Statsforvaltaren i Møre og Romsdal endrar løyve nr. 2025.0712.T for Herøy kommune til tiltak i sjø ved Eggesbønes i tråd med det som er søkt om, jf. forurensningsloven § 18 første ledd punkt 6.**

Endringa av løyvet omfattar fylgjande:

- Vilkår 1: Endrast slik at løyvet omfattar naudsynt sprenging/fortanning i tillegg til utfyllinga.
- Vilkår 2.6: Endrast slik at vilkåret gjeld for alt tiltaksarbeid i sjø (inkludert sprenging).
- Vilkår 2.7: Endrast slik at vilkåret gjeld for alt tiltaksarbeid i sjø (inkludert sprenging) og det kan nyttast både siltgardin og sjeté som partikkelbarriere.
- Vilkår 2.10: Nytt vilkår med krav til sprenging.
- Vilkår 3.3: Lagt til linje om avbøtande tiltak ved uakseptable målingar av turbiditet.



- Vilkår 3.5: Nytt vilkår med krav om overvaking av støy ved Mowi sitt anlegg.

### Klagemoglegheiter

Vedtaket kan klagast på til Miljødirektoratet etter reglane i kapittel VI i forvaltingslova av partane i saka eller andre med rettsleg klageinteresse innan tre veker frå avgjerda er motteke. Ei eventuell klage skal nemne kva det klagast over og den eller dei endringar som ynskjast. Klaga skal grunnjevast, og opplysningar som kan ha innverknad på saka bør nemnast. Klaga skal sendast til Statsforvaltaren i Møre og Romsdal.

Ei eventuell klage fører ikkje automatisk til at iverksettinga av vedtaket vert utsett. Statsforvaltaren eller Miljødirektoratet kan etter oppmoding eller av eget initiativ avgjere at vedtaket ikkje skal settast i verk før klagefristen er ute eller klaga er avgjort, jf. § 42 i forvaltingslova. Avgjerda av spørsmålet om iverksetting kan ikkje klagast på.

### Varsel om sakshandsamingsgebyr

Statsforvaltaren i Møre og Romsdal syner til forureiningsforskrifta kapittel 39 om gebyr til statskassa for arbeid med løyve mv. Vi varslar at saka (handsaminga av endringssøknaden) vert plassert under gebyrsats 7, jf. forureiningsforskrifta § 39-3, jf. § 39-4. Gebyrsatsen svarar til eit beløp på kr 23 700. Vår ressursbruk ved handsaminga av søknaden vil verte lagt til grunn for valet av gebyrsats. Her omfattast gjennomgang og høyring av søknaden, korrespondanse med søkjaren, utarbeiding av løyve og innsats frå ulike fagpersonar hjå Statsforvalteren. Dersom sakshandsaminga medfører ein vesentleg annan ressursbruk enn fyrst lagt til grunn, vil vi kunne velje ein annan gebyrsats.

Eventuelle kommentarar til varselet om gebyrsats skal sendast til Statsforvaltaren i Møre og Romsdal innan to veker, jf. forvaltingslova § 16. Det vert fatta vedtak om gebyr før utsending av faktura, og vedtaket vil kunne klagast på. Reglane om innkrevjing av gebyr til statskassa for Statsforvaltarens konsesjonshandsaming finnast i forureiningsforskrifta kapittel 39 og kan lesast på [www.lovdatab.no](http://www.lovdatab.no).

Med helsing

Christian Dahl (e.f.)  
underdirektør

Thomas Aurdal  
senioringeniør

*Dokumentet er elektronisk godkjent*

Vedlegg:

1                      Endra løyve

**Kopi til:**

**MOWI ASA**

**FISKERIDIREKTORATET**

**Postboks 4102 Sandviken**

**Postboks 185 Sentrum**

**5835**

**BERGEN**

**5804**

**BERGEN**



## Løyve for Herøy kommune til utfylling i sjø ved Eggesbønes

Løyvet er gjeve i medhald av lov av 13.mars 1981 nr. 6 om vern mot forureiningar og om avfall § 11 jf., og endra i medhald av § 18. Det er sett vilkår etter forureiningslova § 16. Løyvet kan ikkje nyttast før det òg føreligg naudsynte løyve eller avklaringar etter plan- og bygningslova, hamne- og farvasslova og kulturminnelova.

Verksemda må avklare skriftleg på førehand med Statsforvaltaren i Møre og Romsdal eventuelle endringar den ønskjer å gjere i forhold til opplysningar i søknaden eller under saksbehandlinga som kan ha miljømessig påverknad.

Løyvet gjeld frå **dags dato** og er gjelande fram til **31.12.2028**.

### Bedriftsdata og informasjon om tiltaksområde

Bedrift	Herøy kommune
Lokalisering/gateadresse	-
Postadresse	Postboks 274, 6099 FOSNAVÅG
Org. nummer (bedrift)	964 978 840
Lokalitet for tiltaket	Eggesbønes
Koordinatar for tiltaket (UTM 32)	X: 326788, Y: 6914346
Gards- og bruksnummer for tiltaket	Gnr. 38 bnr. 292 og 301
Kommune tiltaket utførast i	Herøy

### Statsforvaltarens referansar

Løyvenummer	Anleggsnummer	Risikoklasse <sup>1</sup>
2025.0712.T	1515.0079.01	4
Løyve gitt:	Endringsnummer:	Sist endra:
11.09.2025	1	13.05.2026
Arkiv: 2025/4458		

Christian Dahl (e.f.)  
underdirektør

Thomas Aurdal  
senioringeniør

*Dokumentet er elektronisk godkjent*

<sup>1</sup> Miljømyndighetene sitt system for berekning av hyppigheita på frekvensbasert tilsyn, der risikoklasse 1 er høgast og 4 er lågast.



## Endringslogg

Endringsnummer	Endringar av	Punkt	Endring
1	13.05.2026	1	Endra slik at òg naudsynt sprenging/fortanning omfattast av løyvet.
		2.6	Endra slik at vilkåret gjeld for alt tiltaksarbeid i sjø.
		2.7	Endra slik at vilkåret gjeld for alt tiltaksarbeid i sjø og sjeté kan nyttast som partikkelbarriere.
		2.10	Nytt vilkår med krav til sprenginga.
		3.3	Lagt til linje om avbøtande tiltak ved uakseptable målingar
		3.5	Nytt vilkår med krav om overvaking av støy.

## 1. Verkeområde for løyvet

Løyvet omfattar utfylling med om lag 300 000 m<sup>3</sup> reine massar i eit område på om lag 50 000 m<sup>2</sup> (65 000 m<sup>2</sup> med fyllingsfot) ved gnr. 38 bnr. 292 og 301 i Herøy kommune. Det omfattast òg naudsynt sprenging/fortanning for stabilitet. Løyvet gjeld reine massar som er eigna til føremålet.

## 2. Utfylling i sjø

- 2.1 Det føresettast at tiltaket gjennomførast som angitt i søknaden send inn 25.06.2025, og endringssøknad send inn 08.05.2026, dersom ikkje anna går fram av løyvet, andre vedtak eller på annan måte er avklart med Statsforvaltaren i Møre og Romsdal.
- 2.2 Statsforvaltaren skal varslast når arbeidet startast.
- 2.3 Utfyllingsmassane skal ikkje overskride konsentrasjonsgrensene tilsvarande tilstandsklasse II for sedimenter i samhøve med Miljødirektoratet sin rettleiar for klassifisering av metall og organiske miljøgifter i vatn, sediment og biota (M-608/2016). Massane skal samstundes ligge innanfor normverdiane fastsett i forureiningsforskrifta kapittel 2 vedlegg 1. Det er ikkje lov å nytte reaktive bergartar. Massane skal vere eigna til føremålet. Det er ikkje lov å fylle ut med massar dersom hovudføremålet er å kvitte seg med massane.
- 2.4 Det må utførast tiltak etter behov for å redusere spreieing av sprengtrårestar og anna avfall frå fyllmassane så mykje som mogleg. Tiltak kan vere utsortering i forkant av utfylling, bruk av lense eller oppsamling frå vassflata. Massar med høgt innhald av sprengtrårestar eller anna avfall som kan spreie seg i vatnet skal ikkje nyttast til utfylling i sjø.
- 2.5 Tiltaksområdet ved prøvestasjon «S1» (jf. Norconsults rapport) er forureina i vesentleg grad med miljøgifter og må dekkast til med ei «sandpute» beståande av eit lag på minst 0,3 meter finare massar før det fyllast ut med stein. Dette skal minimere faren for at forureina sediment på staden skal virvlast opp og spreieast og skal òg uskadeleggjere miljøgiftene på sjøbotnen i eit langsiktig perspektiv.
- 2.6 Tiltaksarbeid i sjø (utfylling, sprenging) skal ikkje utførast i gyte- og tidleg oppvekstperiode for torsk frå og med 1. februar til og med 31. mai.
- 2.7 Tiltaksarbeid i sjø (utfylling, sprenging) skal koordinerast med aktivitetane på MOWI sitt anlegg 30597 Eggesbønes for å unngå negativ påverknad på fisk i anlegget. Det skal så lenge det er naudsynt nyttast



partikkelbarriere som siltgardin eller sjeté som hindrar spreieing av partiklar frå utfyllingsarbeidet i retning av Mowi sitt anlegg.

2.8 Støy frå utfyllingsarbeida og/eller anleggstrafikk skal ikkje overskride grenseverdiane i rettleiaren "Retningslinje for behandling av støy i arealplanlegging" (T-1442/2021).

2.9 Dersom det under arbeid i tiltaksområdet treffast på kulturminne under vatn som er verna etter kulturminnelova §§ 14 eller 4, skal arbeidet straks stansast, og Stiftelsen Bergens Sjøfartsmuseum eller Møre og Romsdal fylkeskommune varslast omgåande, og avtale må føreliggje før arbeidet kan fortsettast.

2.10 Sprenging i sjø skal generelt utførast med små sprengladningar for å redusere sprengtrykkspåverknaden i nærområda. Sprenginga skal så langt det er praktisk mogleg gjennomførast under lågvatn for å minimere trykkbølgeforplantinga. Sprenging i «posisjon 1-4», jf. figur 5.1 i Multiconsults rapport, skal berre utførast når merdane på Mowi sitt anlegg er tomme for fisk. Sprenging i «posisjon 5-8» skal ikkje utførast med større intervallvekt enn 1 kg om det er fisk i merdane.

### 3. Kontroll og overvaking

3.1 Det skal gjennomførast kontroll og overvaking av tiltaksarbeidet etter med eit kontroll- og måleprogram. Kontroll- og måleprogrammet skal inngå i verksemdas internkontrollsystem og skal vere i tråd med rettleiaren for turbiditetsmålingar Norsk Standard NS 9433:2017 *Turbiditetsovervåking av vannforekomster*. Programmet skal vere tilstrekkeleg omfattande til å avdekke eventuell uakseptabel spreieing av forureining i tilknytning til tiltaket. Program for turbiditetsmåling med kart over planlagde målestasjonar med grunngjeving skal sendast til statsforvaltaren i god tid før arbeidet startast opp.

3.2 Under anleggsperioden skal det kontinuerleg gjerast målingar av:

- Turbiditet i minst ein referansestasjon i området som ikkje er påverka av anleggsarbeidet.
- Turbiditet i minst ein målestasjon nedstraums som er påverka av anleggsarbeidet og som, jf. NS 9433 «plasseres i den retningen fra tiltaket og i den dybden der man forventer at partikkelspredningen er størst, eller der de gir resultater som er relevante for beskyttelse mot den belastningen som økt turbiditet vil medføre».

3.3 Det skal settast ein grenseverdi for turbiditet (målt i NTU) over turbiditet på referansestasjonen som ikkje skal overskridast over ein periode på eit gitt tal på minuttar. Ved overskridingar av grenseverdien utover denne perioden, skal det settast i verk tiltak for å avklare årsakssamanheng. Dersom overskridinga skyldast interne tilhøve, skal arbeidet stansast med ein gong og naudsynte tiltak gjennomførast. Prosessen kan ikkje startast opp igjen før turbiditeten er nede på stabile nivå under grenseverdien. Rutinar og eventuelle tiltak skal skildrast i internkontrollen. Grenseverdi og varigheita av perioden den kan overskridast, skal nemnast og grunngjevast i overvåkingsprogrammet, som skal sendast til Statsforvaltaren i god tid før anleggsarbeidet startast opp. Dersom målingane viser at det er naudsynt, skal det gjerast avbøtande tiltak som å redusere intensiteten i arbeidet, gjere arbeidet under meir høvelege vind- eller bølgetilhøve eller å nytte straumsetter for å få turbiditeten ned på akseptable nivå.

3.4 Det skal førast logg over resultat frå overvakinga, og over mengder og tidspunkt for utfylling av massar. Loggen skal som eit minimum òg innehalde eventuelle overskridingar og korrigerande tiltak. Loggen skal vere tilgjengeleg ved eventuelle tilsyn.



3.5 Det skal utførast støyovervaking ved fiskemerdane i Mowi sitt anlegg så lenge det er praktisk mogleg. Overvakinga skal utførast i tråd med anbefalingane i Multiconsult sin rapport, med anbefalte grenseverdier. Dersom målingane viser at det er naudsynt, skal gjerast avbøtande tiltak som å nytte boblegardin for å redusere støyeksponeringa i merdane. Eventuelt boblegardin skal monterast i tråd med retningslinjene i Multiconsult sin rapport.

#### 4. Rapportering

4.1 Det skal sendast ein sluttrapport til Statsforvaltaren innan 6 veker etter at anleggsarbeidet er avslutta. Rapporten skal innehalde:

- Ei kort skildring av tiltaket og utførte avbøtande tiltak
- Resultat frå turbiditetsmålingar/overvaking
- Eventuelle overskridingar og korrigerande tiltak.

4.2 Utførte målingar av kjemisk tilstand i sedimenta (jf. Norconsults rapport med oppdragsnr. 5181198, datert 14.08.2018) skal registrerast i databasen *Vannmiljø innan 31.12.2025*. På nettsida til databasen finnast rettleiing og ei oversikt over kva parameter som skal registrerast.

#### 5. Internkontroll, beredskap og varslings

5.1 Tiltakshavar skal med ein gong varsle Statsforvaltaren om alle unormale tilhøve som har, eller kan få innverknad på forureiningssituasjonen.

5.2 Tiltakshavar pliktar å ha eit oppdatert internkontrollsystem, jf. forskrift om systematisk helse-, miljø- og tryggleiksarbeid i verksemdar (internkontrollforskrifta) av 6. desember 1996. Internkontrollen skal mellom anna sikre og dokumentere at verksemda overheld krava i dette løyvet, forureiningslova, produktkontrollova og relevante forskrifter til desse lovene.

5.3 Tiltakshavar pliktar å gjennomføre tiltak for å unngå, eventuelt redusere risikoen for akutte utslipp frå alle aktivitetar knytt til dette tiltaket. Slike tiltak skal vere basert på ein systematisk gjennomgang av alle element i tiltaksaktiviteten.

5.4 Den ansvarlege skal sørge for å ha den naudsynte beredskapen for å hindre, oppdage, stanse, fjerne og redusere verknaden av akutt forureining for all verksemd, jf. forureiningslova § 40. Beredskapen til den ansvarlege skal stå i eit rimeleg høve til sannsynet for akutt forureining og omfanget av skadane og ulempene som kan inntreffe. Beredskapsplikten inkluderer også utstyr og kompetanse til å fjerne og redusere verknaden av ei eventuell forureining.

5.5 Ved akutt forureining eller fare for akutt forureining som følgje av verksemda, skal den ansvarlege varsle i samhøve med *forskrift av 09.07.1992 om varslings av akutt forureining eller fare for akutt forureining*. Melding om akutt forureining gjerast til brannvesenet, **telefon: 110**. Kystverket har vaktberedskap 24 timar i døgnet og får meldingar frå brannvesenet om akutt forureining.

#### 6. Generelle vilkår

6.1 Forureiningsmyndigheitenes vilkår skal ikkje vere til hinder for at andre myndigheiter kan stille krav med heimel i anna lovgiving.



- 6.2 Tiltakshavar er ansvarleg for at vilkåra i løyvet vert overheld. Tiltakshavaren pliktar å orientere dei som skal gjennomføre tiltaka om dei vilkåra som gjeld, og om dei restriksjonane som er lagt på arbeidet.
- 6.3 Forureiningsmyndigheta, eller dei den gjev mynde til, skal til ei kvar tid ha tilgjenge til området for inspeksjon.
- 6.4 Statsforvaltaren kan oppheve eller endre vilkåra i løyvet, sette nye vilkår, og om naudsynt trekke løyvet attende, dersom føresetnadar gitt etter forureiningslova § 18 er til stades. Statsforvaltaren har på det same grunnlaget rett til, på eit kvart tidspunkt, å stanse arbeidet.
- 6.5 Dersom det viser seg at dei miljøbeskyttande tiltaka ikkje verker som føresett i vilkåra, kan den ansvarlege med ein gong verte pålagt å sette i verk ytterlegare tiltak.